

Iluarsiissut

Saqqummiussissut 14. februar 2022-meersoq taarserpaa
(Iluarsiisuut oqaatsitigut aaqqiissuteqarnernik imaqarpoq)

**Arnanut nakuusertarneq angerlarsimaffinnilu nakuusertarneq pitsaaliorniarlugit
akiorniarlugillu Europarådip isumaqatigiissutaanik (Istanbulimi isumaqatigiissummik)
Kalaallit Nunaanni Namminersorlutik Oqartussat akuersissuteqarnissaat pillugu
Inatsisartut aalajangiiffigisassaattut siunnersuut**
(Meeqqanut, Inuusuttunut Ilaqutariinnullu Naalakkersuisoq)

Saqqummiussissut

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Nakuusertarnerup pitsaaliorneqarnissaa akiorneqarnissaalu Naalakkersuisut anguniagassatut takorluugaasa annersaasut ilagivaat. Innuttaasut amerlavallaarujussuartut ulluinnarni angerlarsimaffinni nakuuserfiusuni inuupput – nakuusernermik eqqugaasutut imaluunniit angerlarsimaffinni nakuusernermik isiginnaartutut.

Nakuusertarnerit ataasiartumik pineq ajorput. Nakuusernerit inuunerup sinneranut sunniuteqartarput aamma akueriuminaatsumik nalaassimasamik kingunerluutinnguussinnaapput.

Arnanut nakuusertarneq aamma angerlarsimaffinni nakuusertarneq ulluinnarni atugassarititatut akuerineqassanngilaq. Pitsaaliuinikkut nakuusertarnerullu akiorneqarneratigut, nakuusertarnerit amerlassusiisa ikilisinneqarnissaannik angusassamik toraagaqarlutik taamaammatt Naalakkersuisut suliaqarput. Taamaattumik massakkut qanigisariinni nakuusertarnerup akiorneqarnissaanut iliuusissanut pilersaarummik suliaqarpugut, taassumalu angusassamik toraagaqarluni piffissarlu ungasinnerusoq isigalugu qanigisariinni nakuusertarnerup pitsaaliorneqarneranik suliaqarneq qulakkiissavaa. Tamatuma saniatigut neqeroorut “Alliaq” Naalakkersuisut pilersissimavaat, taanna angutinut arnanullu kamannermik ajornartorsiuteqartunut nakuusermillu pissusilersortartunut saaffiginnippoq. Alliamut saaffiginninnermikkut inuit taakku ajortup ingerlajuartarneranik unitsitsinissaminnut ikiorneqarsinnaapput.

Arnanut nakuusertarnerup angerlarsimaffinnilu nakuusertarnerup qanoq allatut pitsaaliorneqarsinnaanera akiorneqarsinnaaneralu Istanbulimi isumaqatigiissutip sinaakkuserpaa. Istanbulimi isumaqatigiissummi aalajangersakkat amerlanersaat Kalaallit Nunaannit malinneqareerput aamma qanigisariinni nakuusertarneq akiorniarlugu iliuusissanut pilersaarut takkuttussaq Istanbulimi isumaqatigiissutip malinneqarnissaanut annertunerusumik ilanngussissaaq.

23-03-2022

UPA 2022/159

Naalakkersuisut nunatsinni innuttaasunut una anguniarpaat: kikkut tamarmik nakuusernertaqanngitsumik toqqissisimallutik ulluinnarni inuuneqassasut.

Istanbulimi isumaqatigiissutip akuersissutigineqarnera inuiaqatigiinnitsinni nakuusernerup pitsaaliorneqarnissaanut akiorneqarnissaanullu kajumissuseqalersitsinermik sunniuteqassaaq. Tamanna angerlarsimaffinni nakuusernarnermik unammilligassatta suliarineqarnera pillugu ilumoorussinerput iliuuseqarnerpullu avatangiisitsinnut takutitsissaaq.

Taamatut oqaaseqarlutik immikkoortup akuersaartumik suliarineqarnissaanut suliaq Naalakkersuisut Inatsisartunut tunniuppaat.